

POVODOM JUBILEJA

Ekonomski fakultet u Brčkom proslavio je dana 7. i 8. novembra 2008. godine rijedak jubilej – stodvadesetpetogodišnjicu razvoja ekonomske misli u našem gradu. Povodom toga, na našem Fakultetu organizovan je Međunarodni okrugli sto. Za ovu temu prijavilo se 23 nastavnika i saradnika, kako iz naše zemlje, tako i iz inostranstva, koji su autori ili koautori 18 prijavljenih naučnih radova.

Kako je poznato, u dalekoj školskoj 1883/1884. godini, bila je upisana prva generacija učenika u prvi razred Trgovačke škole u Brčkom, u prvu školu te vrste u Bosni i Hercegovini. Ta činjenica da je Brčko tada dobilo prvu srednju školu te vrste apostrofira dovoljno relevantnost razvoja ekonomskog obrazovanja u našem gradu, jer je tada razvoj školstva mnogo kasnio i u poređenju sa onim našim narodima koji su bili u sastavu Austro-Ugarske Monarhije ili su se ranije oslobodili od Turaka.

Poslije završetka Prvog svjetskog rata u Brčkom dolazi do reforme tadašnjeg školstva u kojoj se, poslije gotovo 40 godina rada, Trgovačka škola zatvara (1919/1920.), a umjesto nje osniva se Niža Gimnazija. Zatim je u Brčkom školske 1923/1924. godine počela s radom Trgovačka akademija.

Školske 1930/1931. godine državna Trgovačka akademija iz Brčkog bila je premještena u Banja Luku (iz Drinske u Vrbasku banovinu). Kasnije je školske 1939/1940. godine ponovo bila otvorena državna Trgovačka akademija koja je radila i u toku Drugog svjetskog rata, a nastavila je s radom i poslije završetka rata.

Školske 1950/1951. godine Trgovačka akademija dobija naziv: Srednja ekonomska škola, a 1958/1959. godine dobila je novi naziv: Ekonomska škola u Brčkom. Poslije toga je 1961. godine u Brčkom otvorena Viša ekonomsko-komercijalna škola (VEKŠ) koja je u široj regiji i samom gradu dala veoma značajne kadrove za privredne djelatnosti.

Tadašnje tri vijeća Skupštine opštine Brčko donijela su, 23.09.1976. godine, jednoglasno, odluku da se u Brčkom osnuje Ekonomski fakultet (prije 32 godine) koji je do 1992. godine funkcionisao u sastavu Univerziteta u Tuzli. Iz poznatih razloga od 1992. godine ovaj fakultet funkcioniše, kao organizaciona jedinica, u sastavu Univerziteta u Istočnom Sarajevu.

Ovaj jubilej slavimo u veoma složenim društveno-političkim i ekonomskim uslovima našeg tranzicionog razvitka u čijem okviru se i ekonomska nauka, zbog njene najnovije reforme, veoma teško razvija. Naša ekonomska nauka morala bi danas, s obzirom na brojne neriješene ekonomske probleme u našoj zemlji, da ima nezamjenljivo i determinirajuće mjesto, što, nažalost, de facto nije tako. Ona bi morala da analizira privredu i privredne tokove, utvrđuje stanje, dijagnozu i uzroke, terapiju i puteve izlaska iz naših ekonomskih teškoća i ekonomske krize. Međutim, da bi to mogla uspješno da obavlja, ona – kao i nauka u cjelini – mora biti nezavisna i nesputana, slobodna od pritiska dnevnih, regionalnih i svih drugih štetnih interesa koji je posebno danas vode u sve dublji kolaps. Ona bi, najkraće rečeno, morala da bude više društveno i materijalno vrednovana.

Dužnost svih naučnih radnika, a posebno ekonomista morala bi biti da svoja znanja, svoj intelekt, sopstvene analitičke i radne sposobnosti, svoj talent stave na raspolaganje društvu, da traže i predlažu rješenja za i u okviru našeg i to najšire shvaćenog tranzicionog društva i privrede.

Pripremajući se za organizovanje Međunarodnog okruglog stola povodom 125 godina razvoja ekonomske misli u Brčkom imali smo u vidu i činjenicu da za ovakvu tematiku postoji veoma veliki interes, ne samo naših ekonomista nego i ekonomskih stručnjaka iz inostranstva, kao i šireg našeg građanstva, koje permanentno prati trend razvoja ekonomske nauke i naučnih dostignuća u cjelini.

Organizovanje Okruglog stola sa navedenom temom na Ekonomskom fakultetu u Brčkom, postigli smo, po našem mišljenju, veću artikulisanost i imanentnost ekonomskog obrazovanja na području našeg grada, a u isto vrijeme, zahvaljujući iznijetim različitim pristupima rješavanja pojedinih ekonomskih problema, doprinijeli smo većoj aktuelizaciji ekonomske misli u cjelini. Na ovom međunarodnom naučnom skupu zaključili smo da ekonomska nauka, s obzirom na prisutnost brojnih ekonomskih problema u našoj zemlji, mora konačno da zauzme adekvatno mjesto u bosanskohercegovačkom društvu, koje joj već odavno pripada. To znači da, ne samo naša ekonomska misao, nego i nauka u cjelini, treba da bude esencijalni generator našeg ukupnog društveno-ekonomskog razvoja. Ukratko, stoga joj posebno danas, u našem tranzicionim uslovima privređivanja, treba posvetiti dužnu pažnju. Inače, ako se to ne dogodi u skorije vrijeme, naša današnja veoma krhka privreda će dospjeti u još dublju ekonomsku krizu iz koje će teško moći da izađe.

REDAKCIJA